

TEZAU LITURGIC

11 FEBRUARIE

ACATISTUL SF.CNEAZ VSEVOLOD- GAVRIIL DE LA PSKOV



MOSCOVA, 2000



Акафист

святому благоверному князю Всеволоду во Святом Крещении Гавриилу, Псковскому чудотворцу

Кондак 1

Избранный угодниче Божий, благий
заступниче града Пскова и всея державы
Российския благоверный княже Гаврииле!
Приими от нас милостивно сия песни
хвалебныя, и яко имеяй дерзновение ко Господу,
молися Ему выну о спасении от всяких бед нас
грешных, зовущих ти радостно:

Радуйся, святой благоверный княже
Всеволоде Гаврииле, теплый о нас
молитвенниче.

Икос 1

Ангела нравом, аще и человека естеством,
вемы тя, святыи благоверный княже Всеволоде
Гаврииле; кротостию бо и милостию
преисполнен был еси, блаженне, и соуз
совершенства духовнаго, любовь божественную,
стяжал еси от юности твоея, яко быти тебе
воистину угодником Божиим, достойным похвал
таковых:

Радуйся, от корене святаго произрастший;
радуйся, великаго и равноапостольнаго князя
Владимира правнуче благословенный.

Радуйся, благоверных родителей сыне;
радуйся, княжескаго рода прозябение
честное.

Радуйся, родителя твоего, князя Мстислава,
добродетели унаследивый;
радуйся, благочестию его и храбрости
подражавый.

Радуйся, от младых лет страху Божию
наученный;
радуйся, от юности твоея чтение слова Божия
возлюбивый.

Радуйся, молитвами и милостынями Богу
угождавый;

радуйся, целомудрием и воздержанием себе
украшавый.

Радуйся, праведниче Божий, Егоже правда
сияет непомеркаемо во веки;

радуйся, угодниче Христов, прославленный
на небеси и на земли.

Радуйся, святой благоверный княже
Всеволоде Гаврииле, теплый о нас
молитвенниче.

Кондак 2

Видя себе поставлена волею родителя твоего,
князя Мстислава, на княжение великаго
Новаграда, святой благоверный княже
Всеволоде Гаврииле, храбро отражал еси враги,
на него нападавшия, и суды милостивы творил
еси людем твоим, созидал и благоукрашал
храмы Божия и обители святых, немолчно
воспевая среди трудов твоих праведных
хвалебную песнь Богу: Аллилуиа.

Икос 2

Разумно бысть всем людем Новоградским
благочестие твое христианское, святыи
благоверный княже Всеволоде Гаврииле, егда
обитель во имя святаго великомученика и
победоносца Георгия близ Новаграда соорудил
еси и соборный храм из камене в ней создал еси,
иже доныне свидетельствует нам о твоём
благочестии, о немже тя ублажаем и зовем:

Радуйся, властителю милостивый и кроткий;
радуйся, власть земную праведно и
благочестно содержащий.

Радуйся, нищих и убогих препитающий;
радуйся, вдовицам и сиротам защитник
бывый.

Радуйся, болящих и странников в доме твоём
упокоевающий;

радуйся, язвы и струпы прокаженных руками
твоими врачевующий.

Радуйся, иноков любителю и покровителю;
радуйся, священников усердный почитателю.

Радуйся, храмы Божия от имений твоих
благоукрашающий;

радуйся, обители иноческих созидавый.

Радуйся, Богу и ближним твоим ревностно
служивый.

Радуйся, святой благоверный княже
Всеволоде Гаврииле, теплый о нас
молитвенниче.

Кондак 3

Силою Божію укрепляемъ, святой
благоверный княже Всеволоде Гаврииле,
полчища инородцев, разорявшия пределы
Новоградския, мужественно победил еси, и во
дни глада люди твоя препитал еси, истощевая на
них все достояние твое княжеское, яко быти
тебе воистину отцем и кормителем великаго
Новаграда и всея его области, о немже нищии и
убозии славяху Бога и вопияху Ему: Аллилуиа.

Икос 3

Имея страх Божий в сердца твоем, святой
благоверный княже Всеволоде Гаврииле,
послушание явил еси старейшему великому
князю Ярополку и по воли его от великаго
Новаграда в Переяславль княжити прешел еси,
но по воли Божіей в мале времени паки в
великий Новград возвратился еси княжити, и,

имея пособника себе Нифонта, соборный храм великаго святителя и чудотворца Николая тамо соорудил еси, и храмы Богоматере и Предтечи создал еси, сим показуяй велию любовь твою к Богу и святым Его и подвизаяй нас хвалебно взывать к тебе:

Радуйся, образ послушания нам в себе, явивый;

радуйся, воли старейшаго великаго князя волю твою покоривый.

Радуйся, преселник в земли твоей бывый;

радуйся, горняго града выну усердно взыскавый.

Радуйся, мудрый странниче, на путь спасения стопы твоя направивый;

радуйся, Божий избранниче, скорби многи претерпевый.

Радуйся, кротно и мирно в великий Новград княжити возвративыйся;

радуйся, богоугодно и праведно тамо княживый.

Радуйся, блаженный храмоздателью;

радуйся, благолепия церковнаго любителю.

Радуйся, святых Божиих усердный чителю;
радуйся, небесныя их славы сонаследниче.

Радуйся, святой благоверный княже
Всеволоде Гаврииле, теплый о нас
молитвенниче.

Кондак 4

Буря смятения народного возшуме на тя
люте, святой благоверный княже Всеволоде
Гаврииле: буии и жестоковыйнии от людей
Новоградских, забывше вся твоя благодеяния,
им явленная, возсташа на тя гневом, егда
побеждени быша полки их от полков
суждальских в междоусобней брани; ты же,
гневу их уступая, кротце отшел от них к
великому князю в Киев, зовый во смирении духа
ко Господу: Аллилуиа.

Икос 4

Слышавше о премногих скорбех и безчестиих
претерпенных тобою, святой благоверный
княже Всеволоде Гаврииле, от буйных и
своевольных людей тебе подвластных, дивимся
кротости и терпению твоему и, яко верного
подражателя Христова и мучеником равна,

ублажаем тя с любовью песнями хвалебными
таковыми:

Радуйся, кротости правило, за изгонявша тя
моливыйся яко за благодетельцев;

радуйся, терпения столпе, безчестие
претерпевый от людей твоих.

Радуйся, узы и темницу восприявый
безропотно;

радуйся, во изгнании твоём неправеднем
выну славивый Бога.

Радуйся, временными скорбями достигий
блаженства вечного;

радуйся, возшедый на высоту совершенства
духовного.

Радуйся, блаженство изгнанных правды ради
достойно получивый;

радуйся, в путь изгнания кротко и незлобиво
изшедый.

Радуйся, от великаго князя с любовью
восприятый;

радуйся, в Вышгороде удел от него
получивый.

Радуйся, звездо пресветлая, от Новаграда в Киев пришедшая;

радуйся, всю страну Российскую доблестию терпения твоего удививый.

Радуйся, святой благоверный княже Всеволоде Гаврииле, теплый о нас молитвенниче.

Кондак 5

Благотечно шествовал еси, святой благоверный княже Всеволоде Гаврииле, от Киева паки в Великий Новград, междуусобием народным смятенный, да мир и тишину в нем водвориши; обаче ненавидевшии мира людие новоградстии не восхотеша тя прияти с миром Христовым к ним пришедшаго. Ты же во Псков от них прешел еси, и тамо водворился еси, возлюбив град сей любовью о Господе, Ему же присно пел еси: Аллилуиа.

Икос 5

Видевше твое незлобие и кротость людие Псковстии, святой благоверный княже Всеволоде Гаврииле, прияша тя с любовью, от Великаго Новаграда к ним пришедшаго, и княжити над ними тя устроиша, напавших же

на них за тя бранию отразиша и победиша; ты же благодеянии великими им за сие воздал еси и был еси истинный благодетель людей твоих, иже и взываху к тебе:

Радуйся, око слепых, нога хромым и рука беспомощных бывый;

радуйся, всякому страждущему любвию твоею сострадавый.

Радуйся, Православие во граде твоём ревностно охранявый;

радуйся, злоухищрения латинская от него отражавый.

Радуйся, мечь твой на защиту Пскова мужественно воздвигнувый;

радуйся, оным мир и тишину в земли Псковстей водворивый.

Радуйся, милосердия сокровище всем нищим и убогим бывый;

радуйся, скорбящая и страждущая утешавый.

Радуйся, с плакавшими плакавый;

радуйся, в темнице заключенных посещавый.

Радуйся, пищу и одежду всем требующим подававый;

радуйся, постом и молитвою Богу благоугождавый.

Радуйся, святой благоверный княже Всеволоде Гаврииле, теплый о нас молитвенниче.

Кондак 6

Проповедника тв благочестия яви Господь во граде Пскове, святой благоверный княже Всеволоде Гаврииле; кто бо не умилился, вспоминая великия твоя добродетели: кротость, терпение и нищелюбие; кто не прославит подвиги твоя ратныя, на защиту града твоего явленныя, и твоя суды праведныя и милосердыя, имиже люди твоя облагодетельствовал еси; о сем и мы прославляем прославльшаго тв Господа и зовем Ему: Аллилуиа.

Икос 6

Воссияв, яко солнце пресветлое, добродетельным житием твоим во граде Пскове, святой благоверный княже Всеволоде Гаврииле, по лете едином жительства твоего в нем к западу

смертному приближился еси, и причастився святых Христовых Таин, мирно и безмятежно предал еси святую душу твою в руке Божии. Мы же, чтуще тя, аки надгробную песнь, с любовью и усердием сие тебе поем:

Радуйся, великий угодниче Божий, жизнь земную свято и праведно скончавый;

радуйся, прешедый от скорбей многих на покой вечный.

Радуйся, восприятый со славою во обитель святых;

радуйся, увенчанный от Христа венцем нетленных славы.

Радуйся, мног плачь кончиною твоею причинивый людем псковским;

радуйся, меч твой им завещавый в защиту и ограждение духовное.

Радуйся, преселившийся к Богу душою твоею святою;

радуйся, приявый от Него благодать молиться за град твой и люди.

Радуйся, Пскова славо и похвало;

радуйся, всея Церкви Христовы радование и
утешение.

Радуйся, чудеса дивными в погребении
твоом возсиявый;

радуйся, благоухание сладостное от мощей
твоих испустивый.

Радуйся, святой благоверный княже
Всеволоде Гаврииле, теплый о нас
молитвенниче.

Кондак 7

Хотевшим людем Великаго Новаграда взяти к
себе мощи твоя, святой благоверный княже
Всеволоде Гаврииле, чудотворно им сие
возбранил еси и гроб твой неподвижим соделал
еси; тии же, в раскаяние пришедше о
причиненнем тебе изгнании, со слезами
моляхуся, да поне малая часть мощей твоих
святых даруется им в благословение и утешение,
и приемше нготь, от честныя руки твоея
отпадший, со благоговением в Великий Новград
его принесоша, зовуще дивному во святых
Своих Богу: Аллилуиа.

Икос 7

Блаженство неизглаголанно унаследовал еси, угодниче Божий, разрешився от уз плоти и воспарив душою твоею во оный град прекрасный, Иерусалим Небесный, идеже вси святии упокоеваются; на земли же тело твое святое, во храме святого великомученика Димитрия во граде Пскове, честно погребесе от всего освященного собора, и меч твой над гробом твоим повешен бысть по твоему завету, егоже памятующе, со умилением вопием ти сице:

Радуйся, заступниче усердный града Пскова и всея Российския страны;

радуйся, и по смерти заступлением твоим святым нас не оставляяй.

Радуйся, преславно чудодействуя от мощей твоих честных;

радуйся, мечем твоим ограждая нас от врагов видимых и невидимых.

Радуйся, во дни браней благонадежный граду твоему защитниче;

радуйся, во дни мира всем недужным благодатный целебниче.

Радуйся, ближним и дальним благодеяния
твоя подавая;

радуйся, в сонних и видениях верная
посещая.

Радуйся, святой благоверный княже
Всеволоде Гаврииле, теплый о нас
молитвенниче.

Кондак 8

Странствие земное совершив, от дел
благотворения не почил еси, святой
благоверный княже Всеволоде Гаврииле, но
прияв от Господа велию благодать
чудотворения, всем с верою к тебе
притекающим дары благодатныя всещедро
подаеши от мощей твоих святых и недужныя
безмездно врачуеши едином прикосновением к
честному твоему гробу. Сего ради славим
прославльшаго тя Господа и благодарно вопием
Ему: Аллилуиа.

Икос 8

Весь страха и ужаса исполнился муж
благочестивый, емуже в видении во свете
небеснем предстал еси, благоверный княже, и
рекл ему: «Иди ко освященному собору, князю и

посадником града и рцы им, да принесут мощи моя от храма святого Димитрия в соборный храм Святыя Троицы, тамо бо хочу возлещи». Егда же вопроси он честнаго твоего имене, ты сие ему открыл еси и возвестил еси, яко град Псков предан есть тебе от Господа во хранение до скончания века, и яко имаши его сохранять от язычник и латинь. Таковому светлому явлению твоему дивящися и о заступлении твоём радуящися, сия радостныя возглашаем ти похвалы:

Радуйся, святче Божий, со святыми почивай;
радуйся, о нас грешных Бога выну умоляй.

Радуйся, града Пскова хранителю
неотступный;

радуйся, дивный воителю посмертный.

Радуйся, волю твою в видении людем
псковским объявивый;

радуйся, в соборном храме Святыя Троицы
святыми мощами твоими почивати восхотевый.

Радуйся, светом небесным озаренный;

радуйся, благодати блаженныя
преисполненный.

Радуйся, дивным явлением твоим люди
псковския духовно утешивый;

радуйся, благим обетованием твоим их зело
возвеселивый.

Радуйся, радостный нам вестниче Христова
всемогущества и силы;

радуйся, благомошный предстателю за люди
твоя и град, Богом тебе врученный.

Радуйся, святой благоверный княже
Всеволоде Гаврииле, теплый о нас
молитвенниче.

Кондак 9

Вси людие псковстии со князем своим и
освященным собором изнесоша гроб твой
честный, святой благоверный княже Всеволоде
Гаврииле, из храма святого великомученика
Димитрия, и егда приближишася с ним ко
вратом Пскова, именуемым смердиими, абие ста
гроб твой неподвижим, дондеже по повелению
твоему новая врата в стене града пробиша и
теми гроб твой пронесоша в соборный храм
Святыя Троицы, дивящися сему чудеси и
вопиюще ко Господу: Аллилуиа.

Икос 9

Витийство человеческое не довлеет к
достойней похвале святых, Богом
прославленных на небеси и на земли; недоумеем
и мы смиреннии достойно прославить тя,
святый наш предстателю, благоверный княже
Всеволоде Гаврииле, дивно прославленный на
небеси славою вечною и на земли чудотворным
нетлением святых мощей твоих и многими от
них знаменьями и изцеленьми. Обаче ты, яко
благий и милостивый, не возгнушайся гласов
наших хвалебных, имиже от любви сердечныя
дерзаем благохвалить тя сице:

Радуйся, в пренесении святых мощей твоих
чудесы великими просиявый;

радуйся, мироточения благодать от Господа
получивый.

Радуйся, цвете нетления, облагоухавый
святую Всероссийскую Церковь;

радуйся, смерть вкусивый, тления же не
познавый.

Радуйся, по летех мнозех цел и нерушим в
составех твоих обретенный;

радуйся, нетленен и благоуханен во гробе
возлежавый.

Радуйся, миро благоуханное и целебное от
мощей твоих святых источивый;

радуйся, мира того исцеления многим
недужным даровавый.

Радуйся, в соборном храме Святыя Троицы
телом честне положенный;

радуйся, сосуде, Божия благодати полный и
преизливающийся.

Радуйся, от исполнения твоего и нам даруяй
благодатныя дары;

радуйся, милостивно изцеляяй души наша и
тела.

Радуйся, святой благоверный княже
Всеволоде Гаврииле, теплый о нас
молитвенниче.

Кондак 10

Спасение людям от внезапного разрушения
соборного храма устрояя, угодниче Божий,
явился еси клирику храма и повелел еси ему, да
изнесутся от храма того святии сосуди, иконы и
книги, и людие прочее да не останутся в нем на

молитву, яко хочет явити Господь знамение над мощами твоими; и егда сотвориша тако по повелению твоему, абие нощию падеся верх храма, и сокрушив раку твою, падшим камением отдели от главы твоея малую часть мощей твоих, яко всем дивитися о таковом благопромышлении Господни и пети Богу: Аллилуиа.

Икос 10

Стена защищения граду Пскову был еси, святой благоверный княже Всеволоде Гаврииле, во дни ратных нападений на него иноплеменных и иноверных врагов, и Пресвятей Владычице Богородице в видении предстоял еси с прочими святыми, умоляя Ю о спасении града от ратного разорения, яко предстатель и защититель его неотступный. Сего ради благодарственно ты славим и вопием ти сице:

Радуйся, избранный воеводо, воинство православное воодушевивый к победам;

радуйся, ратей иноверных низложение.

Радуйся, победоносный защитителю града Пскова от воюющих нань языков;

радуйся, пленных и озлобляемых людей твоих
отрадо и утешение.

Радуйся, крепкое их упование;

радуйся, мощами твоими святыми во дни
сильныя брани со врагами на стены града
пришедый.

Радуйся, нападение их невидимо отразивый;
радуйся, покровителю, Богом данный граду
Пскову и всей его области.

Радуйся, щите, защищай их от всякого зла.

Радуйся, святой благоверный княже
Всеволоде Гаврииле, теплый о нас
молитвенниче.

Кондак 11

Пение молебное приносим ти, угодниче
Божий, и с верою и любовью припадающе к
раце святых и многоцелебных мощей твоих,
молим тя всеусердно: молися за нас ко Господу
Богу, да дух благочестия твоего, благости и
милости не оскудевает и в нас немощных и
грешных, да будем чада твоя не по имени токмо,
но делом и всем житием нашим, и сподобимся
вкупе с тобою во блаженней вечности пети Богу:
Аллилуиа.

Икос 11

Светом трисолнечным горе озаренный,
благодарный и святой княже Всеволоде
Гаврииле, озари наша мрачные души сиянием
Божия благодати и настави ны верно исполнять
заповеди Христа Бога: вемы бо, вемы, яко много
может молитва твоя пред благостию Его, яко
верного Его раба и угодника. Сего ради со
упованием благим молитвенно к тебе притекаем
и взываем сице:

Радуйся, великоименитый и многославный
Всероссийский наш заступниче;

радуйся, скипитра царского крепкое
ограждение.

Радуйся, князей удобрение;

радуйся, Церкви Святыя светильниче
пресветлый.

Радуйся, соль земли Российския, яже
николиже обуюет;

радуйся, столпе Православия непоколебимый.

Радуйся, маслино благоплодная, елеем
милости Божия умащающая верныя души;

радуйся, надежный ходатаю нам милости Господни.

Радуйся, неусыпный молитвенниче наш ко Пресвятей Троице.

Радуйся, святой благоверный княже Всеволоде Гаврииле, теплый о нас молитвенниче.

Кондак 12

Благодати причастная рака святых мощей твоих, благоверный княже Всеволоде Гаврииле, яко новая купель Силоамская, даровася нам от Всеблагаго Бога, к нейже не единожды в лето, но всегда притекающе, недужнии здравие получают; благ бо еси и скор ко изцелению, аще токмо веру обретаеши, к сему способствующую в человецех. Темже славим Бога, дивно в тебе прославльшагося, и вопием Ему: Аллилуиа.

Икос 12

Поюще многая твоя чудотворения, угодниче Божий, благоверный и святой княже Всеволоде Гаврииле, молитвенно совершаем святую память твою, яко торжество веры наша православная, в нейже единой процветают толицы чудотворцы, сильние пред Богом

предстательством своим и благодеющей
бедствующим и болящим человеком свыше
данною им благодатию, юже в тебе добре
ведуще, святче Божий, от благодарных устен
сице зовем:

Радуйся, благоволением Пресвятыя Троицы
осененный;

радуйся, всех святых сожителю.

Радуйся, райских селений обитателю;

радуйся, приявый блага нетленная и вечная.

Радуйся, техже благ и нам всежелательный
ходатаю;

радуйся, душевного и телесного здоровья
усердный нам у Господа просителю.

Радуйся, смиренная прошения наша во благо
исполняяй;

радуйся, скорую помощь и заступление твое
нам являй.

Радуйся, от враг видимых и невидимых о
Бозе крепкий наш защитниче.

Радуйся, святой благоверный княже
Всеволоде Гаврииле, теплый о нас
молитвенниче.

Кондак 13

О святыи и благоверный княже Всеволоде Гаврииле! Вонми молитве нашей смиренней и не презри малаго сего хвалебнаго пения, от усердия нашего тебе приносимаго с верою и любовью, и умоли Господа Бога, о еже избавити нас мучений вечных и сподобити блаженства святых, да поем Ему купно с тобою во веки: Аллилуиа.

Этот кондак читается трижды, затем 1-й икос: «Ангела нравом...» и 1-й кондак: «Избранный угодниче...».

Молитва

О, великий угодниче Божий и преславный чудотворче, святыи благоверный княже Всеволоде Гаврииле, града Пскова и всея державы Российския небесный заступниче и покровителю, и всех нас усердный пред Богом предстателю и защитителю! Предстоя Престолу Великаго Царя и Бога нашего, в Троице Святей славимаго и покланяемаго, велие дерзновение имаши к нему, яко верный раб Его и угодник. К тебе убо, яко сродному нам и многомощному пред Господем ходатаю, прибегаем мы грешнии и недостойнии и умиленно просим тя: моли

Триединого Бога, да отвратит от нас гнев свой, праведно по делом нашим на ны движимый, и презрев безчисленные прегрешения наша, обратит нас на путь покаяния и спасения. Огради молитвами твоими в мире живот наш, и во всем благом благое поспешение и вся, яже к животу и благочестию потребная, нам даровати испроси. И якоже древле град твой Псков от пленения и разорения ратного дивно избавил еси, тако и ныне нас и вся грады и веси страны нашея от всяких напастей и бед, и напрасныя смерти, предстательством твоим избави, и от всех враг видимых и невидимых покровом твоим защити. Моли присно милостиваго Бога: страждущую страну Российскую от лютых безбожников и власти их да свободит, и да возставит престол православных правителей, верных рабов Его, в скорби и печали день и ночь вопиющих к нему, многоболезный вопль да услышит и да изведет от погибели живот наш, да тихое и безмолвное житие поживем во всяком благочестии и чистоте, и тако в мире временное сие житие прешедше, в вечный достигнем покой, и сподобимся Небеснаго Царствия, славяще Отца и Сына и Святаго Духа

и твое святое заступление, во веки веков.
Аминь.



ПОЛНЫЙ АКАФИСТНИК КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

І

НОВОЕ
* НЕБО